

Ubvur Uburhu aka atsenge abi Ufirhibi Utsutson ri itsi ubvur Ufirhibi

Uburhu uner itser Uyesu unga atseng ubvur uwurɛ. Iwu ugɛɛ unga atseng umgbɔ ra amɛk aki 57-59 use 61 udzur ru unumkpi umbɔ aka amar Uyesu. Uburhu atseng ubvur uwurɛ ri ivangyɛ unga aka awe ru ugbor uzĩ. Unga atsenge abika adɔsa abi inggbaashia unga aka adzin ru Umakidoniya.

Ubin hã uku utsu umbɔ atseng ubvur uwurɛ, atseng atar uwɛɛ ra abika adɔsa ru uteu Ufirhibi ri itsi iyiyike iyi ızũwã nu ifɛn-Num hã umbɔ aka akorhe ri ivangyɛ Uburhu aka awe ra ayetnum.

Ubvur ha udɛyiwa umɛn ugɛ abɔɔ ani idũwũ Isarhe Iyiki Ize na akpɛmbɔ igbopi itsi nggu Uburhu, bɔr rimi hã, Uburhu awe ra anggɔm ugɛ, << ... Ubinkpi uku uwe ru ugarh kishoo uwe ugɛ adzowe isarhe Ukiristo.>> Ikɛi udɛyiwe ighongamɛn ri itsi imesi igbɛrangwĩ iki isoyi ra abika adɔsa ru Ufirhibi, ikpũ ipipare ha umbɔ aka apara anera ugɛ awu ufang umbɔ adɔsu imesa iyi Umusa na adɔrha akpo ififɔrh. Ubvur ha ufituwe imangmang abi Ufirhibi ugɛ umbɔ amesi iwe ru idɔngamɛn nu irhɛrhi itsi ikpũ iyi Uyesu nu ikpũ ibibima Uburhu aka akorhe, na awu abika agɔm anggɔm ubɛn ivang.

Ri imimasha, ubvur ha idzowe umbɔ itsũwã ugɛ umbɔ ase i sei iyiki ize nggu adɔkambɔ.

Abinkɛ aka awe umɔ

Utsutson ri itsi ubvur ha (1.1-11)
 Agben ibibek ru Uburhu (1.12-26)
 Ibibek ru ubok Ukiristo (1.27-2.18)
 Utimoti nu Uabaforiditu (2.19-30)
 Ififita nu igbiir ato ri itsi abi imesi igberangwĩ
 (3.1-4.9)
 Imimasha (4.10-23)

¹ Ubvur uwire udzeku Uburhu nu Utimoti. Umɛn iwe agārḥũ Ukiristo Uyesu. Umɛn itsenge kishoo aner Unum abika adɔsu Ukiristo Uyesu ru uteu Ufirhipi. Umɛn ikɛi itsenge anggbaashimbɔ nu adikin.

² Unum Utɛmɛn nu Uteijee Uyesu Ukiristo ama adzaa umbi imimuta nu ididɔɔr.

Itarwɛɛ nu ifɛn-Num

³ Umum, Uburhu, itar uwɛɛ ru Unummum ubɛn ivang umum iki ikaiferhkɔ umbi.

⁴ Ubɛn ivang umum ifɛna-Num ru umbi kishoo, umum ifɛn nggu anggɔm akarhārḥā,

⁵ ubinkutsu umbi aka atɔmbi itser nggu umum ri idɛyiwe anera Isarhe Iyiki Ize ha. Umbi aka akorhumbi akɛɛ utirhi ru unumkpi umbi aka awe ru imangmang uba utsĩ icɛɛ.

⁶ Idzidzerhe umum ihwɛng ugɛ Unum aka atirhunga ikorhe iyiki ize ra amɛnmɛn. Nu unga awuri inua ikorha ngge utsekɛku unga aka imasha kishoo ivangyɛ Ukiristo Uyesu aka ibvui aba.

⁷ Irhikungge umum igũ ri imine ri itsimbi kishoo, ngge iki iwe ugɛ umum ĩbema umbi nggu kishoo amɛnmum. Uko umum iwe ru ugborzĩ use ikake Isarhe Iyiki Ize ni ĩdɛyiwe ugɛ iwe idzidzerhe, kishoo umbi agasha nggu umum ri imimuta iyi Unum.

⁸ Unum awu idekamum uge umum ibeemum umbi kishoo akarhārḥā nggu ibibemaye Ukiristo Uyesu aka adzaa umum.

⁹ Umum ifen-Num uge umbi awuri itoma abe-mumbi adoka na aseng ri ihwihwengmbi na adēē atsū ri iyiki irhika nu iyiki ida irhika.

¹⁰ Umbi aba akorhumbi rimi, umbi awuri idēē atsūmbi ubinkpi uku uwe uku uze. Umbi ikēi awuri idēē aseimbi isei iyiki isar iki ishingge ru uvau utseku Ukiristo aka ibvui aba.

¹¹ Umbi ikēi awuri idēē akorhumbi abin aka arhika arherhe ri ijee Uyesu Ukiristo iki uwuri ikū ikpikpoi nu itosa iba ru Unum.

*Uburhu aka awe ru ugborzĩ
itsu Isarhe Iyiki Ize izērḥā*

¹² Umbi angwēmen nu anapumen, umum ibee umbi ahweng uge abin aka abewe ha aka akorhe ru umum atsu Isarhe Iyiki Ize ha izērḥā.

¹³ Icere kishoo abi iwa aki idzeu udzepurhe uyerhe nu kishoo aboo nggimi aka ahwengmbō uge umum iwe ru ugborzĩ ri itsi idzowe isarhe Ukiristo.

¹⁴ Ri itsi umum iki iwe ru ugborzĩ, Uteijee atsu irhe abika adosa nggimi awe ru ikeramen. Umbō ani irherha Arherhu-Num nggu ikeramen akarhārḥā nu isheri iwei.

¹⁵ Awu idzidzerhe uge aboo adzowe isarhe Ukiristo umbō agū unyēē umum na abee aboo anyā umbō awe ru ugarh anangmbō umum. Bōr aboo adzowe isarhe Ukiristo ra amen aka aze*

* **1:15** Nggu ikeramen na aminasu akpo ugarha ideyiwe aboo arherhe ha izūwā.

16 nu ibibema. Umbɔ ahwɛngmbɔ ugɛ atsuka umum ru ugborzĩ ngge itsú umum idɛyiwe anera ugɛ Isarhe Iyiki Ize iwe idzidzɛrhe.

17 Abɔɔ adzowe isarhe Ukiristo ngge itsú umbɔ akpo ubin umbɔ aka abee. Umbɔ asi idzowekumbɔ ngge nggu amɛn aka asar. Umbɔ akaiferhkɔ ugɛ idzowe isarhembɔ iwuri itsu ighongamɛn ru umum ri ivangyɛ umum iki iwe ru ugborzĩ.

18 Bɔr ubinkpi umbɔ aka akaiferhkɔ usi ighongkpɔ amɛnmum. Umbɔ aba akorha ngge ri ifɛrhkɔ iyiki ibewe use ifɛrhkɔ iyiki ize, ubinkpi uku uwe ru ugarh kishoo uwe ugɛ adzowe isarhe Ukiristo. Ake atsu umum inggɔmanggɔm.

Ĩn umum iwuri inggɔmanggɔm,

19 umum ihwɛng ugɛ ru ubok ifɛn-Nummbi nu iyiyikeyɛ iki idzeki Ipfu Uyesu Ukiristo, umum iwuri idze ru ugborzĩ ukpirɛ.

20 Umum ifosa akarhãrhã ugɛ umum isi ígũmum atsak ru ubinkpi umum iki ikorhe. Umum ibee irherhe ni isheri iwei ngge itsú umum idɛɛ ikũ ikpikpoi iba ru Ukiristo ri ikikorhamum, ru nyaka ha umum iki iwe ubɛn ivang. Umum ĩba ĩbɛk use ĩba ikpe, umum ibee ikpoi unga ubɛn ivang.

21 Umum ĩba ibɛk, umum ikpoi Ukiristo ukpekũ, ikɛi ivangyɛ umum iki ikpe, iwuri iwe ru ugarh inangge ibibɛk ru upfung!

22 Umum ĩba inu ibɛk ri iyor iyɛɛ, umum idɛɛ ikorhumum ubinkpi uku awe ru ugarh. Bɔr umum iwuri itsũ ubin ukusong? Umum isi ihwɛng!

23 Umum isi ídɛɛ itsũmum akpe use ibibɛk.

Umum ibee ineke upfung ukpirɛ ni iwe nggu Ukiristo, ubinkutsu, ngge iwe iyiki izea ru umum.

²⁴ Bɔr izengge ru umbi umum ĩba ĩbɛk ri iyorum.

²⁵ Umum ihwɛng izengge ru umbi, nggee umum ihwɛngmum iwuri iwe ru urhɛ nu umum iwuri inu itsermum ru umbi kishoo. Umum ibee iyika umbi atoma awe ru imangmang ru Unum na awe ra anggɔm ra ake.

²⁶ Ngge itsú ivangyɛ umum iki iwe nggu umbi ikei umbi awuri itoma akpoi Ukiristo Uyesu ru ubinkpi unga aka akorhe ru ubokmum.

Ibibɛkyɛ iki imɛ Isarhe Iyiki Ize

²⁷ Ubinkpi uku unang kishoo, ugɛ umbi akorhe ru utsĩndĩwi uku urhika ra abika awe ru imangmang ri Isarhe Iyiki Ize ri itsi Ukiristo. Mɔcɛ umum ĩba iba inyã umbi use igũ arherhe ri it-simbi, umum iwuri ihwɛng ugɛ umbi adɛɛ ak-ermbi urhɔnga na ani itɔ itser akarhãrhã ri ikake abin hã Isarhe Iyiki ize iki imesuwe.

²⁸ Ikei umbi asi ígũmbi iwei ru ubɛn utsĩndĩ abika akpɛna umbi. Ri ikorhe ru nyaka ha umbi awuri idɛyiwe umbɔ ugɛ Unum awuri itsĩme umbɔ, bɔr awuri ifɔrha umbi.

²⁹ Umum irherha akɛɛ ubinkutsu Unum aka adɛyiwanga umbi imimuta ri ineka umbi awe ru imangmang ru Ukiristo nu ikei ahwa ayetnum ru unga.

³⁰ Ayetnum hã icɛɛ umbi aka awe ra ake, awe ru nyaka ayetnumkɛ umbi aka anyã umum ra ake, nu ayetnumkɛ umbi aka agũ icɛɛ umum ini iwe ra ake.

2

*Àka arherhitsi ru nyaku Ukiristo
aka arherhi itsinga*

¹ Umbi aba afita ri itsimbi aka awe abi Ukiristo, nu umbi aba awembi ri idangamen ru ibibemanga ru umbi, nu umbi aba awembi ri iwerha nggu Ipfu-Num, nu Ukiristo aba awea ri inna nu ici-corhe ru umbi,

² mæce àka atsu umum igomagom idzidzerhe ri idosa arherhamum. Umbi àka akaiferhkø abin urhonga. Àka abema adoka. Àka awe amen unying nggu adoka na azĩ ra asu urhonga.

³ Àka niba akorhumbi iferheyε iki itsu umbi awe ru ugarh anangmbi aboo use akorhe ubinkpi uku utsu umbi aberi itsi. Bør àka irherhi atsimbi àka aneke uben unera anyangu uner uwoo ananga unga.

⁴ Umbi kishoo àka niba akaiferhkø na akorha abinke aka iyika umbi ukpekũ, bør àka akorha abin aka aze àka iyike aboo.

⁵ Imēngge umbi akaiferhkø ru nyaku Ukiristo Uyesu.

⁶ Unga awe ru nyaku Unum ru uben utsĩndĩã, bør asi inyangi itsinga awea icaica nggu Unum.

⁷ Unga anyangi itsinga asi iwea ubin, unga awe ugārḥã ri adzeka ri iyor uner.

⁸ Unga aka adzipa awe unera, unga arherhi itsinga na akpe ru nyaka Unum aka adɛyiwe unga. Unga akpe ru utsĩndĩ uwuku ubewe ri inyapuwe unga ru igārḥãmau ucucii!

⁹ Ngge itsu Unum abera unga afafã

ra anangke aka anangke uben anang
na adzowe unga itsokε iki inangke uben itsok.

- ¹⁰ Unum akorha akεε ngge itsú uben unera ra afã
nu abĩ use unorkang abĩ
awuri itar arhu ri idzowe itsi ru Uyesu,
¹¹ nu uben arhem awuri irherhe ukupẽẽ
ugε Uyesu Ukiristo awu Uteijee.
Akεε awuri ikũ imor azĩ ru Unum Ute.

Irhang ru nyaki idzεεr

¹² A aze awεrhamum, rimi hã, aka adɔsa ru
nyaka umbi aka isaka adɔsa ri ivangyε umum iki
ina iwe nggu umbi, àka adẽẽ adɔsa na akorhe icεε
anangmbi umum iki isi iwemum nggu umbi. Àka
atõ itser adεyiwe ififorhmbi nggu iwei nu izizang.

¹³ Umbi adẽẽ akorhumbi akεε ubinkutsu Unum
nibikanga anu itõ itser ru umbi ri iyika umbi
abema na akorhe ubinkpi unga aka abee umbi
akorhe.

¹⁴ Àka niba akorhumbi iferhe ri ibvibvun use
uning,

¹⁵ ngge itsú unera asi írhenunga umbi ri ikorhe
iki ibewe, nu umbi awuri iwe asasar. Umbi awuri
iwe angwẽ Unum aka asi íkorhumbɔ ubin uvau ra
ateu abi amεn aka atãrhã, umbɔ aka isaka akorhe
abin aka abewe. Awu ufang umbi ase iisei iyiki ize
nggu umbɔ ru nyaka abika arhang ugεε idzεεr ra
afafã.

¹⁶ Aka adẽẽ aker ri isarhe idzidzεrhe iyiki id-
zowe urhe. Mɔcε, ru unumkpi Ukiristo aka iba,
ngge iwuri itsu umum ifĩrhã ugε umum isi itõmum
itser iyiki itso ru umbi ibεm.

¹⁷ Abinkε umbi aka adzowe na akorhe aki idze ru imangmangmbi ru Uyesu awe ru nyaki idεm-Num. Uko urhemum uba uwe ru nyaku ungwērḥā abin aka ahwake umbō aka awupuwe izūwā ru idεm-Num, umum iwe ra anggōm nggu umbi kishoo.

¹⁸ Umbi igambi aka agōm anggōm nggu umum.

Utimoti nu Uabaforiditu

¹⁹ Umum ifosa ugε Uteijee Uyesu abemuwa umum idene Utimoti aba ru umbi ifitem, ngge itsú umum ima igōmagōm ivangye umum iki igū isarhe ra atsimbi.

²⁰ Umum ishimum nu uwōō nggu umum ru nyaku Utimoti. Awu idzidzerhe unga abee inyā iker iyormbi.

²¹ Abōō nggimi akpurha akaiferhkō abinkε umbō aka abee na asi ikambō iferhkō abinkε Uyesu Ukiristo aka abee.

²² Bōr umbi ahwεngmbi agε Utimoti aka adεyiwanga iwiwenga. Unga atō itser urhōnga nggu umum adzowe Isarhe Iyiki Ize ru nyaku ungwē aki itō itser nggu utenga.

²³ Nggee uba umum igūmum abinkε abi ijee Uroma aka ikorhuwa umum, umum iwuri idene unga aba ru umbi.

²⁴ Nu umum iwemum ri ikeramεn ugε Uteijee awuri ineka umum iba ru umbi ifitem.

²⁵ Bōr umum ikaiferhkō ugε awu ufang umum idene Uabaforiditu abvui aba ru umbi. Unga awu ungwēmεn. Unga atō itser nggu umum na atang iwa ru nyaku uner iwa nggu umum ri idzowe Isarhe Iyiki Ize. Umbi adene unga ru umum ru unga ayika umum nggu ubinkpi umum iki ibee.

²⁶ Umum ibee idene unga aba ru umbi ubinkutsu umbi agũmbi uge aghonga unga, amɛnnga adake. Ngge itsu unga adzuma abee inyã umbi.

²⁷ Idzidzerhe irhãrhã ighongge unga akpurha abɔr akpe. Bɔr Unum acorhuwe unga nu umum ikei. Unum asi ibeenga umum itoma nggu idɔngamɛn ri idɔng amɛnyɛ umum iki iwerangge.

²⁸ Umum itoma ibee idene unga aba, nggee umbi aba anyãmbi unga ikei, umbi ama agɔm nu umum ima itsuwe ighongamɛnmum.

²⁹ Mɔce aka ayɛi unga nggu ibibema iyi Uteijee nggu anggɔm na adzowe imor ra anera ru nyaka unga.

³⁰ Åka akorha akɛɛ ubinkutsu unga akpurha abɔr akpe ri itser Ukiristo. Unga atsu itsinga ru iyiki ighong ri iyika umum ivangyɛ umbi aka asi idẽẽ ayikambi umum.

3

Unum anyã umbi ru nyaka abika asusar ru ubok imangmang

¹ Arherha akɔɔ akɛ umum iki ibee irherhe. Umbi angwɛmɛn nu anapumɛn, aka agɔm anggɔm uge umbi awe abi Uteijee! Asi íwea ighighong ru umum itsɛnga abin ru umbi akirakɛ umum iki ititi itsɛnga umbi. Ngge iwuri ika umbi ri imangmangmbi.

² Niba uneke aner ha aki ikorhe ru nyaki íjui akũna umbi ayapumbɔ. Umbɔ akorhe iyiki ibewe ivangyɛ umbɔ iki ibee usorhe uwe utsar ififɔrh, umbɔ akpurha azharhuwe agau ayormbɔ.

³ Umən iwe ru usorhe idzidzerhe ukpu ipfu, ubinkutsu umən idzowe igəng ru Unum ri Ip-funga, umən iwe ru ikeramən ru Uyesu Ukiristo, umən isi iwemən ru ikeramən uge ititəwāmen iwuri ifərɥ umən.

⁴ Bər umum iwemum nu ubinkpi uku utsu umum ikeramən.

Unera aba akaiferhkə uge ititəwānga iwuri ifərɥ unga, məcə unga ahwəng uge umum itəwā inang unga.

⁵ Asorhuwa umum ru unum ukpu utərək. Umum iwu uner Uisairha. Umum iwe ru unang Ubanjami. Umum iwu utsa Uyahuda. Uyamum nu utemum awu abi Uyahuda. Umum iwe Ufarisi abika adəsi Íkpem anangmbə ubən unera.

⁶ Umum İdəyiwe itsu amənmum ru Unum ri id-zowe uver ra abika adəsu Uyesu. Umum inyangu itsimum irhika ru utsĩndĩwi umum iki udəsi Íkpem.

⁷ Bər kishoo abinkə umum iki ikaiferhkə uge awu ake atsu umum iwe asasar ra asu Unum, icere umum inyā ake asi iweke ubin, ri itsi umum iki iwe ru imangmang ru Ukiristo.

⁸ Abinkə aka anang, umum irhi ubən ubin ugeɛ usi imēkpə ivangye umum iki ikpanga ukpə nggu nggaa ugarhkpi ukpuku uhwəng Ukiristo Uyesu Uteijeemum. Umum iki itarukū kishoo ubən ubin-mum ri itsinga. Umum irhi abina ru nyaka abinkə aka ashike ru ugarh ru umum ima ikpo Ukiristo,

⁹ ni ikpo iwe uwu unga. Unum asi inyanga umum iwemum uner uwuku urhika ri idəsi Íkpem. Bər unga anyanga umum uner uwuku urhika ri iwe ru imangmang ru Ukiristo. Irhirhika ha idzeku Unum ru ubok imangmang.

¹⁰ Umum ibee ihweng Ukiristo nu ijee iyiki isoknga ra akpe nu igasha ra ayetnumnga, ni iwe ru nyaka unga ra akpenga.

¹¹ Ngge itsú umum ima isok ra akpe ikɛi.

Igɔpa izĩ ra asu

¹² Isi iwengge ugɛ umum iki ikpomum akɛrɛ kishoo, umum inasi iwemum ru nyaka Ukiristo, bɔr umum ikpurhi itsu amɛnmum ibee iwe ru nyaku Ukiristo, aki ha atsu Uyesu akpɔm umum.

¹³ Umbi angwɛmɛn nu anapumɛn, umum isi ikakũ ifɛrhkɔ ugɛ umum iki idzur ikpɔmmum ukpɔ, bɔr umum ikorhu ubina unying. Umum iyiruwe ubinkpi uku utɔngkpɔ ra andzing nu itɔ itser akarhãrhã igɔpa izĩ ra asu ru ubinkpi uku uwuri ikorhe.

¹⁴ Umum igɔpa nggu ikermum izĩ ra asu ru ubinkpi uku udzɛu umum ri imimasha. Umum ikorhe rimi ngge itsú umum iyɛi ugbɛtɛ Unum aka ayisa umum ra afã izĩ iyɛi, ru ubok ubinkpi Ukiristo Uyesu aka akorhe.

¹⁵ Kishookamɛn iki iseng ri imangmang, imɛngge umɛn irhi abina ru utsĩndĩ uwɛrɛ. Nu unermbi unying aba akaifɛrhkɔ iyikise ru ubina unying ra abin hã umum iki irherhe, mɔcɛ Unum awuri iyikuka unga anyã ru utsĩndĩ uwuku urhika ikɛi.

¹⁶ Bɔr umɛn ima isisei ru nyaka abinkɛ umɛn iki imesa uba utsĩ icɛrɛ.

¹⁷ Umbi angwɛmɛn nu anapumɛn, àka agbopa nggu abɔɔ ri ikorhe ru nyaka umum. Àka arhi abirabɛ aka abɛk ru nyaka abinkɛ umɛn iki ìdzaa umbi.

18 Ubinkutsu anera arherhe abek ru nyaka anggamtsak igãrhãmau ucucii Ukiristo. Umum iki ideyiwamum akere isha, nu icere umum irherhe ake ikai nggu anyĩ.

19 Ivangye umbɔ aka ikpe, umbɔ awuri itsĩ ri itsitsĩm. Unummbɔ awu anambɔ. Abinke umbɔ aka agɔm awu abin ishĩ umbɔ aki ikorhe. Amɛnmbɔ awe ra abin upfung.

20 Bɔr umɛn iwe abi afã. Umɛn ini idzeu uwuku ufɔrh umɛn Uteijee Uyesu Ukiristo, uwuruwi aka idzeku nggɔ ha.

21 Unga awea ri ijee iyiki ikũ abina kishoo aba ri ididarhnga. Unga awuri ikũ ijee ha afaruwe ayormɛn aka aghong irhãrhã na akpe icere ngge itsú ake awe ru nyaki iyinga iyiki ibek ugbagbaa.

4

1 Nggee, umbi angwɛmɛn nu anapumɛn, ngge iwuri itsu umbi adẽẽ aker ri idɔsu Uteijee. Umbi awe awerhamum iki ibema ni idzumi ibee inyã. Umbi atsu umum igɔmagɔm. Umbi awe ru nyaku nggaa itosa iyi itsermum iki itso.

Ishishãrhũ Uburhu

2 Umum ishãrhã ungo Uafodiya nu Usintiki umbi akaiferhkɔ unying nggu adɔka ubinkutsu umbi awe ru imangmang ru Uteijee.

3 Ñ, ikai umum irhusa ungo uwerhe itsermum uwu idzidzerhe uyike akatserh abere aka atɔ itser akarhãrhã ayika umum ri idzowe Isarhe Iyiki Ize. Ukirhemen nu abɔɔ aka atɔ itser nggu umum ikai nu kishoo atsokɛ umbɔ aka atseng ru ubvur uwu urhe.

⁴ Uben ivang àka agom anggom uge umbi awe abi Uteijee. Umum iwuri irherhumum ikèi, àka agom anggom!

⁵ Àka adèyiwe uben unera ididòrye umbi aka awe. Uteijee asi ídārhunga na aba.

⁶ Niba angwārhūmbi anaa ri itsi uben ubin, bər àka arhusu Unum ubinkpi umbi aka abee, àka ashōrhā unga na atar uwēē ru unga.

⁷ Nu ididòrye Unum aka adzowe, ididòr ha iki inangge kishoo ihwihweng iwuri ikake iferhkambi nu ubinkpi umbi aka igū ra amēmbi ubinkutsu umbi awe ru imangmang ru Ukiristo Uyesu.

⁸ Umbi angwēmen nu anapumen, ubinkpi uku udōsa umum iki ibee irherhe unggakpi. Àka adēē akaiferhkō ri itsi abinke aka awe idzidzerhe na awe ru imor na arhika na asar ru abinke aki itsu amēn agom anggom, nu abin aka aze inyīnyā, nu udzumu ize na amēēke iyēi ikpikpoi.

⁹ Àka akorhe kishoo abinke umbi aka amesa na ayei na agū na anyā ru umum. Unum uwuku udzowe ididòr awuri iwe nggu umbi.

*Uburhu atar uwēē ru umbō
ru iyiyikembō*

¹⁰ Umum iwe ra anggom akarhārkhā nggu ikpū anggōmkē Uteijee aka adzaa ubinkutsu umbi ikēi aka adèyiwambi umum ibibemambi. Ngge iwe idzidzerhe uge umbi abemumbi umum uben ivang, bər umbi asi ikpombi utsīndī uwuku udeyiwa ingge.

¹¹ Umum isi ini umum irherhe akere uge umum ibee ubin, umum iki imesumum igōmagom nggu uben ubinkpi uku ukpo umum.

¹² Umum iki imesumum ibek nggu ida ubin nu ibek nggu iwe ru ubinkpi uku unangkpɔ ubinkpi umum iki ibee. Umum iki imesumum ibima nggu uben ubinkpi uku ukorhe ru umum. Umum iwe ra anggɔm ivang anaamum aka atək na ashike ru ubin, ivangye umum iki ikpo inang ubinkpi umum iki ibee nu ivangye umum iki isi ikpomum ubinkpi umum iki ibee.

¹³ Ukiristo ani adzaa umum iker iyiki igamagɔm ru uben ubinkpi uku ukorhe ru umum.

¹⁴ Uko rimi hā, aze umbi aka ayika umum nggu ubinkpi umum iki ibee.

¹⁵ Awu use anang akere ha, ivangye umum iki ibore Umakidoniya, abika adɔsu Uyesu abɔɔ asi iyikambɔ umum nggu uhwek uku utɔitser Unum. Umbi ukpekū akpurha akorha aki ha ri ivangye umbi abi Ufirhibi aka awe abika afa ri idəsi Isarhe Iyiki Ize.

¹⁶ Uko ivangye umum iki iwe ru Utasarhonika, umbi ayikambi umum anangmbi idiki unying ri ivangye umum iki ibee.

¹⁷ Umum isi irherhumum rimi uge umum ibee iyei izūwā iyɔɔ. Bɔr umum ibee umbi akpo itosa akarhār hā ru Unum.

¹⁸ Umum iki iyeisū abina kishoo umbi aka adene ru ubok Uabaforiditu. Umum ikpo inang abinke umum iki ibee. Iyiyikembi iwe ru nyaki idem iyiki iwe ru isung iyiki ize umbɔ aka adzowe ru Unum. Unga ayei ngge nggu anggɔm.

¹⁹ Unummum awuri idzaanga umbi abina kishoo umbi aka abee ru abinke unga aka awurake ubinkutsu umbi awe ru imangmang ru Ukiristo Uyesu.

²⁰ Unum Utɛmɛn ama awe ru ikpikpoi ugbagbaa nu ugbagbaa. Iwerimi.

Imimashi ighwe

²¹ Àka aghwe kishoo abika adɔsa, abirabɛ aka awe ru imangmang ru Ukiristo Uyesu. Abika adɔsa aka awe nggu umum nggimi aghwe umbi.

²² Kishoo aner Unum nggimi aghwe umbi, undzumunga abika awe ru udzепurhe Ukaisar.

²³ Imimutu Utejee Uyesu Ukiristo ima iwe nggu umbi kishoo. Iwerimi.

**Ibibemuwe-Num Iyiki Ifa Ru Dũya
Duya: Ibibemuwe-Num Iyiki Ifa Ru Dũya (New
Testament)**

copyright © 2024 Wycliffe Bible Translators, Inc.

Language: (Duya)

Translation by: Dũya Development Association

Contributor: SIL Nigeria

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 8 May 2025 from source files dated 8 May 2025

3ccd0531-8578-54e4-a023-62d4592e4b27